

**Kalaallit Nunaani eqqartuussisarnermi inatsisip, Meeqqat inatsiseqartitaanerannik
Kalaallit Nunaanni inatsisip, aappariilersarneq aappariikkunnaartarnerlu pillugit
Kalaallit Nunaannut inatsisip aamma aappariinnermi inatsisitigut kingunerisassat
pillugit Kalaallit Nunaannut inatsisip allanngortinneqarnissaannik inatsit pillugu
Inatsisartut aalajangiiffigisassaattut siunnersuut. (Kalaallit Nunaanni
kingornussisarneq agguasarnerlu pillugit inatsisit nutarterneqarnerisa
kingunerisaanik allannguinerit)**

pillugu

Inatsisinut Ataatsimiititaliap

siunnersuutip aappassaaneerpeqarneranut

ISUMALIUTISSIISSUTAA

Ataatsimiititaliap suliarinninnermini ilaasortarai:

Inatsisartunut ilaasortaq Harald Bianco, Inuit Ataqatigiit, siulittaasoq

Inatsisartunut ilaasortaq Anders Olsen, Siumut, siulittaasup tullia

Inatsisartunut ilaasortaq Asii Chemnitz Narup, Inuit Ataqatigiit

Inatsisartunut ilaasortaq Knud Mathiasen, Inuit Ataqatigiit

Inatsisartunut ilaasortaq Mala Høy Kúko, Siumut

Ulloq 22. marts 2022-mi siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Siunnersuut saqqummiunneqartoq ataatsimiinnermi matumani suliarineqartussamut UPA2022/131-mut attuumassuteqarpoq. UPA2022/131 agguassinnermi suliassanik arlalinnik suliarinninnissamut piginnaatitsinerup najukkani eqqartuussivinnit Nunatsinni Eqqartuussivimmuut nuunneqarnissaanik kinguneqarpoq. Siunnersuutip matuma siunertaraa, Kalaallit Nunaani eqqartuussisarnermi inatsimmi aammalu Kalaallit Nunaani ilaqutariinnut tunngasumik inatsimmi allannguutit, UPA2022/131-p atuutilersinneqarnerata pisariaqalersitaasa, atuutilersinneqarnissaat. Taamaalillunilu matumani pineqarpoq siunnersuut inatsisinik ilusiliinermut tunngasoq innuttaasut pisinnaatitaaffiinik pisussaatitaaffiinillu allanngortitsinavianngitsoq.

Ataatsimiititaliap siunnersuummik suliarinninnera

Folketingip inatsisaasa Kalaallit Nunaannut atuuttut allangortinneqarnissaannik missingiutit saqqummiunneqartut danskit Kalaallit Nunaanni akisussaaffeqarfiisa ineriartortinneqarnerannik danskit naalakkersuisuisa Namminersorlutillu Oqartussat suliaqarnerannut atatillugu suliarineqarput Kalaallit Nunaannilu kingornussisarnermut aamma peeruttut pigisaannik agguaassisarnermut inatsisiliornerit nutarterneqarnissaannik nukittorsarneqarnissaannillu siunertaqarlutik.

Kalaallit Nunaanni eqqartuussisarnermik inatsit:

Agguaassinermik sulianik siullermeerluni suliarinninnermi aalajangiisinnaanermut piginnaatitaanerup najukkani eqqartuussivinnit Nunatsinnilu Eqqartuussivimmit avinneqarneranik missingiut imaqarpoq.

Meeqqat inatsiseqartitaanerannik Kalaallit Nunaannut inatsisit:

Kingornussisarnermi inatsimmut atuuttumut innersuussineq atorunnaarsinneqarpoq oqaatsitigullu iluarsisooqarluni.

Aappariilersarnej aappariikkunnaartarnerlu pillugit inatsisit:

Missingiummi oqaatsitigut ataasiakkaanik iluarsisooqarpoq, soorluttaaq aalajangersakkat ataasiakkaat atorunnaarsinneqartut, taakkumi peqqussutissat missingiutini malittarisassiuunneqarnissaat siunnersuutigineqarmat.

Aappariinnermi inatsisitigut kingunerisassat pillugit Kalaallit Nunaannut inatsit:

Aappariit suli katissimatillutik pisuussutitik qanoq agguartassaneraat inatsimmi malittarisassiuunneqarpoq.


Aalajangersakkat ilaat aqutigalugu aapparisaasup aappaataa pisuussutit ataatsimoorussat assigiinngitsutigut annikillissimappagit aapparisaq imaluunniit aapparisaq kingornussisussaata akissarsianik tunineqarnissamik piginnaatinneqarput. Agguaassisoqarnissaanulli atatillugu, tassa avinnermut imaluunniit aapparisaasup toquneranut atatillugu, akissarsiasat tunniunneqarnissaat piumasarineqarsinnaavoq. Akissarsialli agguaassinermut atatillugu tunniunneqarnissaat aappariit avissappata imaluunniit aapparisaq toqunerani aatsaat piumasarineqarsinnaavoq. Malittarisassat taakku peqqussutissat missingiummi (UPA2022/131) maleruagassiuunneqarput. Siunnersuutigineqartukut malittarisassat imminnut naapertuunnerat qulakkeerneqarpoq.

Tamatuma saniatigut innersuussutit allangortinneqarput, aalajangersakkallu ataasiakkaat atorunnaarsinneqarlutik, tassami taakku peqqussutissat missingiummi (UPA2022/131) allassimmata.

Ataatsimiititaliap inassuteqaatai

Ataatsimiititaliap isumaqatigiittup siunnersuutip akuersussutigineqarnissaa inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.



Anders Olsen
Siulittaasoq




Aqquale Jerimiassen
Siulittaasup tullia



Harald Bianco



Mariia Simonsen



Mala Høy Kúko